

Sikũn Pêtre **Simãw Pêtre kot Jejus kôt hkwýjê** **hwýr wam kagà nê mēnh kôt hō** **mēnh**

Simãw Pêtre na pre kagàja nhĩpêx. Jejus nhỹ hã hkrajê jahkre ho mẽ pa xwýnhjê hō na pre. Mẽ kêp Jejus kra hkêť xwýnhjaja ra kot Jejus ã hpĩr kaxyw nhũm pre kagàja nhĩpêx nê krĩ piitã hkôt Jejus kwýjê hwýr kurẽ nê kamã hprĩ hã mẽ kãm mẽmoj tã karõ. Mẽ kot arĩ Tĩrtũm kot amnhĩ nhĩpêx kôt amnhĩ nhĩpêx rãhã ho pa hã mẽ kãm karõ. Nẽ hamaxpêr o mẽ hamaxpêr rãhã ho pa hã mẽ kãm karõ.

Nẽ mẽ hkwý kot Tĩrtũm kôt amnhĩ nhĩpêx ã amnhĩ jarēnh tã hkôt amnhĩ nhĩpêx kêt xwýnhjaja nhũm pre tanhmã mẽ harēnh to. ã na pre mẽ kãm mẽmoj jarēnh nê hã kagà nê krĩ piitã hkôt mẽ hwýr rēnh anē. Nẽ mẽ kãm:

¹ Pa Kris kôt ixtõ nê ixtõxjaja. Xà mẽ amex? Ot pa mẽ awýr kagà nhĩpêx nê krĩ piitã hkôt mẽ awýr kurẽ. Ixpê Simãw Pêtre na pa wam ixte kagà nhĩpêx nê mẽ awýr mẽnh tã axte hō nhĩpêx. Ixte Jejus Kris nhỹ hã mẽ ajahkre ho ixpa xwýnh ã mẽ amã hipêx nê kumẽ. Na pa hte Jejus mã amnhĩ nhĩpêx mex o ri ixpa.

Nẽ mẽ papytãr xwýnh Jejus Krisja Tĩrtũm pyrã nê mex o mex. Nẽ wa kot amnhĩ nhĩpêxja mex o mex. Jakamã na pre wa tanhmã mẽ pahkrã hto pu mẽ amnhĩ kaxyw wa hkôt pajamaxpêr tỳx rãhã ho

ri papa. Na ka htem ixpyrà nê ã amnhĩ nhĩpêx anê. Tã pa mẽ amã kagàja nhĩpêx.

² Nà Tĩrtũm mẽ mẽ panhõ Pahihti Jejus wa kot amnhĩ nhĩpêxja na ka mẽ ra harênh mar tỳx nê. Wa kot tanhmã amnhĩ nhĩpêx to nê tanhmã wa hamaxpêr toja ka mẽ mar tỳx nê wa hkôt pix mã amnhĩ nhĩpêx. Tã kêr ka mẽ arĩ ã amnhĩ nhĩpêx anhỹr rãhã ho ri apa. Jao axàmnhĩx ajamakêtkati nê akĩnh nê apa ho apa. Na pa hte ã mẽ ato Tĩrtũm mẽ Pahihti Jejus Kris wa hwỳr o ri ixpa anê. Na hte Tĩrtũm mẽ ato mex nê mẽ akutã nojarêr rãhã ho pa.

Tĩrtũm kot mẽ pahto mex o pa hã harênh

Epes 2.12-13; Wam Tesarõn 1.2-4; Sikün Pêtre

3.18

³ Nê Tĩrtũmja àhpumunh tỳx o àhpumunh tỳx jakamã na pu htem hkôt amnhĩ xunhwỳ nhũm amnhĩ tã mẽ pahpumu nê mẽ pamã àhpumunh tỳx xà hkwỳ gõ. Hãmri pu mẽ ra uràk nê amnhĩ to mex nê tãm amnhĩ nhĩpêx o ri papa. Tã kot puj mẽ nhỹrmã ma õ krĩ hwỳr api. ⁴ Na pre mẽ pakukamã amnhĩ jarênh o:

—Kot paj nhỹrmã ixkrajê mã ixte amnhĩ nhĩpêx mex kwỳ gõ nhũm mẽ inhỹ hã ho tãm ri amnhĩ nhĩpêx mex o pa. Nê ixpyrà nê hamaxpêr mex o pa.

Anhỹr jao te ra mẽ pamã hkĩnh xà mex kwỳ nhõr pyràk o mẽ panhĩpêx. Nê te ra kot mẽ pahkrãm hamaxpêr mex jagjênh nê mẽ pamã kot amnhĩ nhĩpêx mex jagjênh pyràk. Mẽmo kaxyw na pre ã mẽ panhĩpêx mex anê? Nà uràk nê tãm mẽ pahte amnhĩ nhĩpêx mex rãhã o ri papa kaxyw. Jao mẽ pahte mẽ kêp hkwỳ hkêr xwỳnhjê hkôt

amnhĩ nhĩpêx kêt nê. Nê mẽ hamaxpêr punuj o pajamaxpêr kêt nê. Nê hpãnhã mẽ pahte Tĩrtũm kôt pix mã amnhĩ nhĩpêx rãhã ho papa. ã mẽ pahte amnhĩ nhĩpêx anhỹrja na mex o mex. ⁵ Tã ã Tĩrtũm kot mẽ panhĩpêx mex anhỹr jakamã kwa kêr ka mẽ kapêr mar tỳx nê hkôt pix mã amnhĩ nhĩpêx mex o ri apa. Jao amnhĩ kaxyw hkôt ajamaxpêr rãhã nê. Kot kaj mẽ ã amã amnhĩ nhĩpêx anhỹr o apa hprãm hã kot kaj mẽ mããnẽn amã tãm amnhĩ nhĩpêx o apa hprãm. Nê mẽ amã Tĩrtũm kapêr piitã mar prãm o ri apa. ⁶ Hãmri nê piitã mar pa nê mẽmoj punuj piitã nê amnhĩ to htỳx nê. Nhũm mẽ kêp Kris kwỳ hkêt xwỳnhjaja Kris ã tanhmã mẽ anhĩpêx to htã ka mẽ ãm amnhĩ tã mẽ omu nê mẽ umaj mẽ amã Kris kaga hprãm kêt nê.

Nê mẽ amã Tĩrtũm mã amnhĩ jarẽnh rãhã ho apa hprãm.

Nê mẽ amã kapêr mar rãhã ho apa hprãm.

⁷ Nê mẽ amã Kris kôt mẽ atõ nê mẽ atõxjê ho mex pix o ri apa hprãm. Jao te mẽ amã amnhĩ tã ma pyræk o mẽ piitã mẽ hipêx o ri mẽ hkôt apa.

⁸ E kêr ka mẽ ã amnhĩ nhĩpêx anhỹr o ri apa. Kot ka mẽ ã amnhĩ nhĩpêx anê nê mẽ panhõ Pahihti Jejus Kris kôt amnhĩ nhĩpêx mex o mõi. Hãmri nhũm mẽ akwỳjaja mẽ apumu nê mẽ apê Kris kwỳ hã mẽ ajarẽnh kurê kumrêx. ⁹ No kot ka mẽ atõ ixkapêr mar tã hkôt amnhĩ nhĩpêx kêt nê hãmri te Tĩrtũm kot anê ate amnhĩ tomnuj rẽnh par mã ajamaxpêr kêt pyræk. ¹⁰⁻¹¹ No na ka htem ã amnhĩ nhĩpêx anhỹr kêt nê. Ra mẽ ate Pahihti Jejus Kris kôt amnhĩ nhĩpêx mex jakamã na htem ja hã mẽ apumu nê Tĩrtũm kot mẽ ato hkra hã mẽ ajarẽnh

kurê kumrêx. Kot kaj mẽ ã hkôt amnhĩ nhĩpêx anhỹr o apa nê mẽmo arĩgro hã apunuj nê apa htã Jejus kaga hkêt nê. Hãmri nê nhỹrmã ma Tĩrtũm nhõ krĩ hwỹr api nhũm mẽ apumu nê mẽ ato mex rax nê. Hãmri ka mẽ õ krĩ kamã mẽ panhõ Pahihti Jejus Kris wa kuri atĩr tũm nê amex nê apa ho apa.

¹² Nê na ka mẽ ra Tĩrtũm kot amnhĩ nhĩpêx mar tỳx nê amnhĩ krã kamã kot amnhĩ nhĩpêx mã ajamaxpêr tỳx o ri apa. Tã nom kot paj arĩ mẽ amã ja jarênh rãhã ho ri ixpa. ¹³ Kormã ixtĩr ri kot paj xatã mẽ amã harênh o amnhĩrĩt. Ja na kêt inhmã hprãm. Mẽ ate nhỹrmã tanhmã ri ajamaxpêr to nê hkaga pumaj. ¹⁴ Na pre mẽ panhõ Pahihti Jejus Krisja inhmã tokyx ixtyk ã ijarê. Kot paj xep kritpêm ri ixtĩr nê ixpa hkêt nê. ¹⁵ Jakamã na pa kormã ixtĩr ri ã mẽ amã kagã nhĩpêx anê. Mẽ ate inhmỹr pê arĩ omunh nê kamã harênh nê Tĩrtũm kot amnhĩ nhĩpêx mã ajamaxpêr tỳx rãhã ho ri apa kaxyw.

Pêtre kot no ho Jejus pumunh ã amnhĩ jarênh

Matêwre 17.1-5; Makre 9.1-8; Sikũn Ximotre 3.16-

17

¹⁶ Nê na pa pre ra tanhmã mẽ amã mẽ panhõ Pahihti Jejus Krisja jarênh to. Hihtỳx o hihtỳx ã harê nê àhpumunh tỳx o àhpumunh tỳx ã harê. Nê nhỹrmã akupỹn mẽ pahwỹr wrỳk ã harê. No na pa pre amnhĩ krã hkôt ã harênh anhỹr kêt nê. Na pa pre inhno ho Jejus hihtỳx o hihtỳx ã omunh o hkôt ixpa nê ixte omunh xã hkôt ã mẽ amã harênh anê. ¹⁷⁻¹⁸ Amnepê mã kormã ixkwỳjê mẽ mẽ ixte arĩ hkôt ixpa ri pa prem hkôt hixêt prêk nhĩmõk wỹr api. Pa nê kaxyw Xiakre nê Juãw mẽ pa mẽ hkôt

ixpimràatã hixêt ã api nê himôk ã ixkuhê. Hãmri nhũm Tĩrtũm tanhmã Jejus to nhũm hirã htỳx kãm xa. Hãmri nhũm Mẽpahpãm Tĩrtũmja mẽ inhmã kapêr. Kaxkwa kamã hirã htỳx rax rũm mẽ inhmã kapêr o:

—E ota Ixkrata xa. Inhmã hapê ho inhmã hapê. Anê.

Tã ra ixte mar xà hkôt pa amnhĩ xô ri mẽ amã harê nê hã kagà. ¹⁹ Na pa prem ã hixêt prêk nhĩmôk ã Jejus pumunh nê Tĩrtũm kot tanhmã harênh to hã mar anê. Hãmri nê ijamaxpêr o:

—Nà ãm hãmri na pre amnepêm Tĩrtũm nhỹ hã kapêr jarênh o mẽ pa xwỳnhjaja Jejus kukamã ã harênh anhỹr o pa. Anê.

Mẽ kot tanhmã Jejus kukamã harênh toja te kot kamàt kô kamã kanê hpôk nhĩrã hkryre pyràk. Tã koja nhỹrmã akupỹn wrỳ hãmri nê te myt kator nê hirã mex nhũm mẽ pahte mẽmoj pumunh mex pyràk. Jakamã kwa kêr pu mẽ kot tanhmã Jejus kukamã harênh toja mar tỳx rãhã nhũm nhỹrmã te myt kator pyrà nê akupỹn mẽ pahwỳr wrỳ. ²⁰ Tĩrtũm kapêr ã kagà htũm kot tanhmã ỹ hã kapêr jarênh xwỳnhjê jarênh to. Mẽ kot mẽmoj kukamã ujarênh ã mẽ harê. Nê Jejus kukamã tanhmã ujarênh to hã mẽ harê. ã mẽ kot mẽmoj kukamã harênh kot anhỹr. Nom na pu htem amnhĩ krã hkôt ã mẽ ujarênh anhỹrja mar tỳx kêt nê. Koja Tĩrtũm Karõ hprĩ hã mẽ pamã ho amnhĩrĩt pu mẽ rĩ kormã pahprĩ hã mar tỳx nê. ²¹ Na pre ỹ hã kapêr jarênh o mẽ pa xwỳnhjaja amnhĩ krã hkôt hkwyjê mã ujarênh o pa hkêt nê. Tĩrtũm Karõ na pre tanhmã mẽ hkrã hto nhũm mẽ ỹ hã hkwyjê mã tanhmã harênh to ho pa nê ỹ hã mẽ pamã hã kagà.

2

Tĩrtũm kapêr jarênh o hêx xwỳnhjê jarênh

Korosê 2.16-17; Wam Ximotre 4.1-5; Sikūn Ximotre 3.1-9; Jutre 3-16

¹ Nê amnepêm na pre Ijaew kwỳjaja te mẽ kêp Tĩrtũm nhỹ hã kapêr jarênh xwỳnh pyràk. Nom Tĩrtũm kapêr kwỳm ri hkwỳjê mã tanhmã ho hêx to ho pa. Tã koja nhỹrmã mẽmojaja mẽ uràk nê mẽ awỳr mra nê ã mẽ amã Tĩrtũm kapêr o hêx o pa anê. Nê kapêr kwỳm ri tanhmã mẽ ajahkre hto ho mẽ amã hêx o mẽ akôt pa. Mẽ ate mẽ mar nê amnhĩ nhĩpêx nyw kaga nê hpãnhã mẽ kot amnhĩ tomnuj kôt apa hprãm xàj nhũm mẽ hêx rom tanhmã mẽ ajahkre hto ho pa. Pahihti Jejus kot mẽ nê htyk tã nhũm mẽ hkôt amnhĩ nhĩpêx kêt nê axtem nê ri kapêr o hêx o pa. Mỳrapê koja Tĩrtũm tokyx mẽ kot amnhĩ xà htỳx kamã hamak tũm xà hwỳr mẽ rênh pa.

² Koja mẽ ohtô nê mẽ kapêr ma nê kãm mẽ mar prãm nê. Nê mẽ hkôt hamaxpêr nê mẽ hkôt amnhĩ nhĩpêx o pa. Jao ra hpijaàm kêt nê mẽ hkôt htỳx ri tanhmã amnhĩ tomnuj to ho ri pa. Tã ã mẽ kot Tĩrtũm kapêr o mẽ hêx xwỳnhjê mar nê mẽ hkôt amnhĩ nhĩpêx anhỹr jakamã koja mẽ kãm Tĩrtũm kapêr mar prãm xwỳnhjaja mẽ kot amnhĩ nhĩpêx ã mẽ omu nê Tĩrtũm kapêrja mex kêt ã harênh japêr.

³ Tĩrtũm kapêr o mẽ hêx o mẽ pa xwỳnhjaja na htem kàxpore pix prãm xàj mẽ awỳr mra nê tanhmã mẽ amã kapêr jarênh o hêx to ho pa nhũm Tĩrtũm ja hã mẽ omunh rãhã ho hkrĩ. Na hte nhỹhỹm mrrar kêt nê rỳ htỳx ôt o hikwỹ hkêt nê. Na hte arĩ mẽ kot amnhĩ nhĩpêx ã mẽ omunh rãhã ho hkrĩ. Tã koja

nhỹrmã ma mẽ kot amnhĩ xà htỳx kamã hamak tũm xàta hwỳr mẽ kurẽ nhũm mẽ ma hwỳr hapêx pa.

⁴ Nẽ amnepê mã kaxkwa kamã Tĩrtũm kapêr o mẽ wrỳk xwỳnh kwỳjaja na prem axtem nẽ Tĩrtũm kapêr nhĩrôp kuhê nhũm tee ri amnhĩ tã mẽ omu hãmri nẽ amnhĩ nê mẽ kator pa. Mẽ kamã ukapĩrĩ hkêt nẽ amnhĩ nê mẽ kator pa hãmri nẽ mẽ kot amnhĩ xà htỳx kamã hamak tũm xàta wỳr mẽ hano. Nhũm prem ma hwỳr pa nẽ ahkre xupỳm kãm kamàt kô kamã arĩ hkrĩ ho hkrĩ. Tĩrtũm kot mẽ piitã tanhmã mẽ harênh to xà hã arĩgroja jamãr o hkrĩ. Nẽ tee ri kãm hapôx prãm kaprỳ ho hkrĩ.

⁵ Nẽ amnepêm pika kamã ri mẽ pa xwỳnhjaja na prem haxwỳja piitã amnhĩ tomnuj pix o ri pa. Jakamã nhũm Tĩrtũm ja hã mẽ omu nẽ mẽ kamã ukapĩrĩ hkêt nẽ. Nẽ mẽ hwỳr na rax mẽ. Mẽ kãm kapêr mar prãm kêt jakamã nhũm mẽ hwỳr kumẽ nhũm wrỳk rax kumrêx nẽ mẽ hanhir pa nẽ mẽ himex. ãm Noehti mẽ hkwỳ pê 7 pixjaja nhũm mẽ kurom htĩr nẽ hkà hkĩnh nẽ mex nẽ pa. Noehti kormã na xwỳj ri kot mẽ kãm Tĩrtũm kapêr jarênh o ri mẽ hkôt pa htã nhũm mẽ kuma nẽ ãm kuma. Mỳrapê na prem piitã pikaprãr pa.

⁶ Nẽ Sotô mẽ Gomo wa kamã mẽ pa xwỳnhjaja haxwỳja na prem amnhĩ tomnuj tỳx kumrêx o pa nhũm Tĩrtũm wantajê pyrã nẽ mẽ kamã ukapĩrĩ hkêt nẽ. Na pre kaxkwa rũm mẽ hipy mẽmo hpôk kwỳ rẽ nẽ ho mẽ ho hapêx pa. Tã mẽmo kaxyw na pre ã mẽ hipêx anê? Nà mẽ piitã mẽ kot mẽ harênh mar nẽ hamaxpêr o:

—Na hte ã Tĩrtũm mẽ kot amnhĩ tomnuj xwỳnhjê nhĩpêx anê.

Anhÿr o hamaxpêr kaxyw na pre ã mẽ hipêx anê. ⁷⁻⁸ Nom Rohtija na pre Tĩrtũm Sotõ nê kator jakamã nhũm htyk kêt nê. Na pre hkwÿjê rom tãm amnhĩ nhĩpêx tã mẽ kot amnhĩ tomnuj tÿx xwÿnhjê nhõ krĩ kamã òrkwÿ nê ri pa. Nê apkati mẽ tee ri mẽ kot amnhĩ nhĩpêx ã mẽ omu nê mẽ ÿ hã hkaprĩ nê tee ri mẽ hkukamã hamaxpêr o pa. No nhũm mẽ amnhĩ tomnuj ã amnhĩ pumunh nê tokyx tãm amnhĩ nhĩpêx kêt nê. Nê apkati mẽ tanhmã amnhĩ tomnuj to nê kapêr punuj o pa nhũm Rohti tee ri mẽ omu nê hkaprĩ htÿx nê pa. ⁹ Tã nhũm Tĩrtũm mẽ himex kaxyw nê mẽ nê kator nê mẽ himex pa. Na hte ã Tĩrtũm mẽmoj punuj pê mẽ kot amnhĩ kaxyw kãm hamaxpêr nê hkôt amnhĩ nhĩpêx xwÿnhjê pytãr anê. No mẽ kot amnhĩ tomnuj xwÿnhjaja na hte axtem mẽ hipêx. Tã koja nhÿrmã mẽ pahpiitã tanhmã mẽ pajarênh to xà hã arĩgro kato nhũm ma mẽ kot amnhĩ xà htÿx kamã hamak tũm xà wÿr mẽ rênh pa. Æm tapxipix kot ã mẽ hipêx anhÿr kaxyw àhpumunh tÿx. ¹⁰ Tã mẽ hpijaãm kêt kãm amnhĩ tomnuj o mẽ pa xwÿnhjaja nê mẽ kot Tĩrtũm kapêr mar nê ãm mar xwÿnhjaja koja nhÿrmã mẽ homnuj tÿx nê.

Nê Tĩrtũm kapêr o hêx o ri mẽ pa xwÿnhjaja na htem amnhĩ to jarkrar pix o pa. Nê Tĩrtũm kapêr o mẽ wrÿk xwÿnhjê hã hpijaãm kêt nê. Nê axtem nê mẽ ho kapêr punuj pê tanhmã mẽ haprÿ hto ho pa. ¹¹ Tã nhũm htem amnhĩ tã mẽ kuma nê ãm mẽ kuma. Mẽ kurom mẽ hihtÿx kumrêx tã no ãm amnhĩ tã Tĩrtũm mã tanhmã mẽ ho kapêr to hkêt nê.

¹² Nê mry xoprê na hte htÿx ri pa ho pa. Tã Tĩrtũm kapêr o mẽ hêx o mẽ pa xwÿnhjaja htem mry

xoprêta pyrà nê htỳx ri hamaxpêr mex kêt o pa. Jao hprĩ hã mẽmoj mar kêt tã htỳx ri hijuk ri tanhmã mẽmoj jarênh to.

Nê mry xoprêja htỳx pa nhũm mẽ kot hparja pyrà nê mẽ kot Tĩrtũm kapêr o hêx o mẽ pa xwỳnhjaja koja Tĩrtũm nhỹrmã kuwy hwỳr mẽ ho hapêx nê kamã mẽ rênh pa.

¹³ Nê koja nhỹrmã Tĩrtũm mẽ kot tanhmã mẽ ama hêx to ho pa hã mẽ omunh xà hkôt mẽ homnuj tỳx nê. Na htem hpijaàm kêt nê mẽ piitã mẽ noo mã tanhmã amnhĩ tomnuj to ho pa. Kamàt kãm nê arĩgro hã. Nê mẽ kãm tanhmã amnhĩ nhĩpêx to hprãm xà hkôt pix mã amnhĩ tomnuj o pa.

Na htem te mẽ kêp Kris kôt mẽ atôjê pyrà nê mẽ akôt Tĩrtũm kapêr mar xà hã ixkre hwỳr agjê nê mẽ anhĩhkô hã mẽ kot Jejus tyk mã hamaxpêr kaxyw pãwti hkwy hku. Nom htỳx hkur o hkrĩ nê htyk mã hamaxpêr kêt nê. Kãm Jejus kĩnh kêt tã hêx rom hpijaàm kêt kãm mẽ anhĩhkô hã htỳx ri hkur o hkrĩ.

¹⁴ Nê nhỹri krĩ hwỳr pôj nê mênijê pumu nê kãm mẽ hkĩnh nê. Ra mẽ mjên ri pa htã nhũm mẽ kãm mẽ ho amnhĩkati hprãm nê mẽ kamã hpijaàm kêt o ri pa.

Nê kormã mẽ kot Kris kôt amnhĩ xunhwỳr tohtuj anhỹr xwỳnhjê hwỳr mra nê hêx rom tanhmã mẽ kãm kapêr to pê mẽ no kupyw o ri mẽ hkôt pa. Mẽ kot mẽ mar nê Kris kaga nê mẽ hkôt ri amnhĩ nhĩpêx prãm xà ã mẽ hipêx anhỹr o pa.

Na htem hikàxpore rũnh o pikuprõnh pix kukamã hamaxpêr o ra ho õxy nê.

Ã na htem amnhĩ nhĩpêx anhỹr o pa. Tã ra Tĩrtũm kot mẽ homnuj tỳx kaxyw mẽ hã amnhĩ

jarê. ¹⁵⁻¹⁶ Te mẽ kot kamàt kô kamã pry juk ã hpikunor nê htỳx ri pa pyràk o na htem amnhĩ nhĩpêx nê kãm Tĩrtũm kapêr mar prãm kêt nê amnhĩ tomnuj pix o pa.

Amnepê m Peo hkra Paraãwta kêp Tĩrtũm nhỹ hã kapêr jarênh o pa xwỳnh tã axtem nê kàxpore rax prãm xàj tanhmã amnhĩ tomnuj to kaxyw. Nhũm Tĩrtũm tee ri ja hã omu nê Paraãw krit jumênreja tanhmã hakwa hto nhũm kãm kapêr. Jumênre kapêr kêt tã nhũm Tĩrtũm tanhmã hakwa hto nhũm kãm kapêr nê tanhmã kot amnhĩ tomnuj to kaxywta ã kãm akir nhũm amnhĩ tã kuma hãmri nê ã amnhĩ nhĩpêx anhỹr kêt nê. Tã mẽ kot Tĩrtũm kapêr o mẽ hêx ho mẽ pa xwỳnhjaja na htem Paraãw pyrã nê kàxpore rax prãm xàj tanhmã amnhĩ tomnuj to pix prãm. ¹⁷ Te hino ra grã nhũm mẽ tee ri kamã gô japêr pyràk o na htem amnhĩ nhĩpêx. Rỳ te kakrã hapôx nhũm mẽ kot omunh nê na wrỳk ã hkamnhĩx kaprỳ pyràk. Tã ra Tĩrtũm mẽ kaxyw kamàt kô htỳx pê mẽ kot amnhĩ xà htỳx kamã hamak tũm xàta o mẽ nê. ¹⁸ Na htem htỳx ri amnhĩ tomnuj o pa hã mẽ amã amnhĩ to jarkrar o ri pa. Jakamã nhũm mēhō ra amnhĩ tomnuj kaga kaxyw nhũm mẽ tee ri ja hã omu nê kot ã amnhĩ nhĩpêx anhỹr pymaj tanhmã nê kãm kapêr to nê mẽ kãm:

—Kwa ixte amnhĩ tomnuj o ixpa htã nhũm Tĩrtũm ja hã ixpumu nê ãm ixpumu nê arĩ inhmex ã ijarê. Na pa hte mẽ hkuprỳjê hwỳr mra nhũm ja hã ixpumu nê ãm ixpumu nê hã tanhmã ixto hkêt nê. Jakamã kwa mẽ ixpyrà nê arĩ ã amnhĩ nhĩpêx anhỹr o ri apa. Kojã Tĩrtũm tanhmã hã ato hkêt nê. Anê.

Hãmri nhũm mẽ tee ri kuma nẽ ra hamaxpêr kati nẽ. ¹⁹ Na htem mẽ kãm kapêr o:

—Kwa mẽ ixpyrà nẽ mãmri amã tanhmã amnhĩ tomnuj to hprãm xà hkôt amnhĩ nhĩpêx o ri apa. Mẽhõ kot kêt ja nẽ tanhmã amã kapêr to? Anẽ.

Mẽ kot amnhĩ tomnuj xàja te kêp mẽ õ patrãw pyràk jakamã na htem ãm kôt pix mã amnhĩ nhĩpêx o pa. Jakamã kot pu mẽ tanhmã amnhĩ tomnuj to. Nẽ gaa nẽ axte. Nẽ gaa nẽ ra ho amnhĩ pyràk. Hãmri nẽ tee ri pamã hkaga hprãm kaprỳ nhũm te kêp mẽ panhõ patrãw pyràk o mẽ panhĩpêx pu mẽ ãm kôt pix mã ri amnhĩ nhĩpêx o ri papa.

²⁰ Nẽ koja mẽhõ ra Tirtũm kapêr ma. Nẽ mẽ panhõ Pahihti Jesus Kris jarẽnhja nhũm hprĩ hã kuma. Kêp mẽ pahte amnhĩ tomnuj pê mẽ papytâr xwỳnh ã harẽnh ma. Tã nhũm mẽ kot Tirtũm kapêr o mẽ hêx xwỳnhjaja hwỳr mra nẽ tanhmã kãm ho hêx to nhũm mẽ kuma nẽ kot amnhĩ nhĩpêx tũm o awjanã. Jao amnhĩ tomnuj tỳx o kormã kot Tirtũm kapêr mar kêt ri kot amnhĩ tomnujta jakre. ²¹ Kêp ãm aa kot Tirtũm kapêr mar kêt rãhã htyk ronhỹx ja kãm mex nẽ. Nom ra kot mar mex tã ãm kuma nẽ hkaga jakamã koja mex kêt kumrêx. ²² Mẽ kot ã mẽ kot amnhĩ nhĩpêx anhỹr ã mẽ harẽnh kot:

Rop na hte õjaĩr nẽ akupỹm õjaĩrta ku.

Nẽ hagrô na htem unẽ nẽ hkumrã nhũm muxre.

Tã nhũm mẽ kãm ure nhũm akupỹm hprôt nẽ mra nẽ akupỹm gyw o amnhĩ tomnu pa.

Anẽ.

Tã mẽ kot Tirtũm kapêr o mẽ hêx xwỳnhjê mar nẽ mẽ hkôt amnhĩ nhĩpêx xwỳnhjaja te mẽ kot rop mẽ hagrô wa kot amnhĩ nhĩpêxta pyrà nẽ Tirtũm

kapêr kaga nê akupÿm mẽ kot amnhĩ nhĩpêx tũm o awjanã nê htÿx ri amnhĩ nhĩpêx o pa.

3

Tĩrtũm kot pika ho hapêx kaxyw kormã amnhĩ tã mẽ pajamãr ã harênh

Matêwre 24.29-31; Xiakre 5.7-11; Apokarip 19.11-16, 21.1-8

¹ E Kris kôt ixkràmnhwÿjaja. Na pa pre ra wam kagàta nhĩpêx nê mẽ awÿr kurê. Tã ra axte hkôt ja nhĩpêx. Hamê wa kamã na pa mẽ amã Tĩrtũm kot tanhmã amnhĩ nhĩpêx to hã harê. Nê Jejus Kris nhÿrmã akupÿn mẽ pahwÿr wrÿk ã harê. Mẽ ate mar nê tãm amnhĩ nhĩpêx nê tãm ajamaxpêr o kutêp mẽ apa kaxyw.

² Amnepê mã Tĩrtũm nhÿ hã kapêr jarênh o ri mẽ pa xwÿnhjaja na prem Tĩrtũm kot nhÿrmã mẽ pahwÿr mẽhõ mênh mã xwÿnhnta jarênh o pa. Kot nhÿrmã mẽ pahwÿr wrÿk nê mẽ pahto amnhĩptâr o pa hã harênh o pa. Tã kêr ka mẽ kapêr ma nê hã ano htÿx nê hkôt ajamaxpêr tÿx rãhã ho ri apa. Nê Jejus kot mẽ awÿr mẽ rênh xwÿnhjaja ka mẽ kapêr ma. Mẽ kot mẽ amã mẽmoj jarênh o mẽ pa xwÿnhjaja na htem tanhmã mẽ amã Pahihti Kris jarênh to ho ri mẽ akôt pa. Nê tanhmã kot mẽ panê amnhĩ nhĩpêx to hã harê. Tã kêr ka mẽ kapêr ma nê hã ano htÿx nê kãm ajamaxpêr tÿx rãhã ho ri apa.

³ Nê kwa mẽ inhma. Nhÿrmã Kris akupÿn mẽ pahwÿr wrÿk xwÿj ri koja mẽ kot amnhĩ tomnuj tÿx xwÿnhjaja mẽ awÿr mra. Mẽ hpijaàm kêt o pa xwÿnh jakamã koja mẽ tanhmã mẽ akamã amnhĩ tomnuj to ho pa. Nê mẽ apê Kris kwÿ hã mẽ

apumu nê mẽ atã hpêr o pikênh o pa. ⁴ Nê htỳx ri Kris ã mẽ akukja nê mẽ amã:

—Kwa no Krisja? Annepê̄m akupỳn wrỳk nê mẽmoj piitã tanhmã hipêx to hã amnhĩ jarênh tã arĩ Tĩrtũm kot mẽmoj to kator krax rũm mẽmoj amarĩ rãhãã. Ra mẽ panhĩgê̄tjaja pikaprãr par tã nhũm kormã akupỳn wrỳk kêt nê. Kot mẽ pamã amnhĩ to hêx kênã. Mo kaxyw koja kêt akupỳn mẽ pahwỳr wrỳ? Kot mẽ pamã amnhĩ to hêx kênã. Anê.

⁵⁻⁶ Nom ã mẽ kot harênh anhỳrja kot anhỳr kêt. Tĩrtũm kot mẽmoj to kator krax rũm mẽmoj amarĩ rãhã hã mẽ kot harênhja kot anhỳr kêt. Na pre Tĩrtũm kapêr pix o kaxkwa nê pika ho kato. Nhũm gô hkwyja kapêr mar xà hkôt pika hã amnhĩ jahkre. Nhũm hpãnhã panhĩ nhĩpêx. Tã no nhũm mẽ kapêr mar kêt kumrêx. Nê mẽ kot amnhĩ tomnuj tỳx mỳrapê na pre Tĩrtũm gô ho mẽ himex pa. Jao mẽ hwỳr na rax mẽ nhũm mẽ hanhir o mẽ ho hapêx. No nhũm mẽ kot Jesus wrỳk ã hpêr o pikênh xwỳnhtaja kãm ã mẽ harênh anhỳrja mar prãm kêt. Ra mẽ kot mar tã kãm mar prãm kêt nê arĩ mẽmoj piitã rãhã hã ri harênh o pa. ⁷ Pika nê kaxkwaja arĩ rãhã htã koja Tĩrtũm nhỳrmã mẽ pahpiitã mẽ pahte tanhmã amnhĩ nhĩpêx to hã mẽ pahpumunh kôt tanhmã mẽ pajarênh to. Nê mẽ kot amnhĩ xà htỳx kamã hamak tũm xà hwỳr mẽ kot amnhĩ tomnuj xwỳnhjê rênh pa. Hãmri nhũm rĩ kormã kaxkwa nê pikaja wa pôt nhũm himôk ã mẽmoj piitã hkaxàr pa nê hapêx.

⁸ Nê amgrà pê 1.000ja mẽ pamã amgrà xohtô rax kumrêx no Tĩrtũm mã te arĩgro pixire pyræk. ⁹ Tã ra kot mẽ pamã tokyx Jesus akupỳn wrỳk ã harênh tã

nhũm kormã wrÿk kêt jakamã nhũm htem tōhã tee ri hamãr o pa nẽ hamaxpẽr o:

—Hêxta waa nẽ. Tĩrtũm kot tokyx akupÿn mẽ pahwÿr Jejus mẽnh ã amnhĩ jarẽnh tã tokyx mẽnh kêt nẽ.

Anhÿr o harẽnh tã no ãm kot anhÿr kêt. Na kormã amnhĩ tã mẽ kot amnhĩ tomnuj xwÿnhjê jamãr o pa. Mẽ kot amnhĩ tomnuj kaga nẽ hkôt amnhĩ xunhwÿr prãm xaj kormã amnhĩ tã mẽ hamã. Kãm mẽ kot amnhĩ xà htÿx kamã hamak tũm xàta wÿr mẽhō ho pixire nẽ mōr prãm kêt jakamã na kormã amnhĩ tã mẽ hamã. ¹⁰ Tã koja nhÿrmã mẽ panhō Pahihtija akupÿn mẽ pahwÿr wrÿ. Te mẽ àhkĩnh xwÿnh kot amnhĩ nhĩpêx pyrak o mẽ pajaêr pẽ akupÿn wrÿ. Pu mẽ pahtÿx ri tanhmã paxapênh to ho ri papa nẽ akupÿn wrÿk ã hkamnhĩx kêt rãhã nhũm mẽ pajaêr pẽ akupÿn wrÿ. Hãmri nẽ ma akupÿm amnhĩ kôt mẽ pahte hkôt amnhĩ xunhwÿr xwÿnhjê ho àpir par kuré kumrêx. Hãmri nhũm rĩ kormã kaxkwa kaxàr o hkrihkrit tÿx kãm hapêx pa. Nẽ kanhêti mẽ myt nẽ mytwrÿre kaxàr pa. Nẽ pikaja nẽ mãânẽn kamã mẽmoj piitã kaxàr pa. ¹¹⁻¹² Koja nhÿrmã ã mẽmoj hapêx par anẽ. Jakamã kwa kêr pu mẽ Jejus kutêp tãm ri amnhĩ nhĩpêx rãhã ho ri papa. Nẽ Tĩrtũm kapêr kôt pix mã amnhĩ nhĩpêx rãhã nẽ. Nẽ kãm hprãm xà hkôt tanhmã kãm amnhĩ nhĩpêx to ho ri papa. Kêr kê Jejus akupÿn wrÿ nẽ ã mẽ pahte amnhĩ nhĩpêx anhÿr ã mẽ pahpumu. Koja wrÿ nhũm rĩ kormã kaxkwa nẽ pikaja wa kaxàr pa. Nhũm kuwy mÿri kaxkwa kamã mẽmoj harir xwÿnhja xêr nẽ ôr pa nẽ hapêx. ¹³ Tã kwãr mãmrĩ mẽmoj ã amnhĩ nhĩpêx anẽ. Koja Tĩrtũm

axte mẽmoj mex nhĩpêx. Na pre amnhĩ kukamã ja jarênh o:

Kot paj axte pika nê kaxkwa hõ nhĩpêx nhũm mex o mex. Nhũm mẽ kot amnhĩ kaxyw Jejus mã hamaxpêr nê hkôt amnhĩ xunhwÿr nhũm ixte mẽ mex ã mẽ harênh xwÿnh pixjaja koja mẽ pika nywja kamã mex nê pa ho pa. Anê.

¹⁴ Jakamã kwa ixkràmnhwÿjaja. Kêr ka mẽ Kris kutêp kapêr kôt amnhĩ nhĩpêx mex rãhã ho ri apa. Jao kutêp ajamakêtkati nê axàmnhĩx axpên kôt apa. Kêr ka mẽ nhÿrmã amnhĩ wÿr omu nê tee ri amnhĩ kukamã ajamaxpêr kêt nê. Ate tãm amnhĩ nhĩpêx o apa hã amnhĩ pumu nê akĩnh nê amnhĩ wÿr omunh o akuhê.

¹⁵ Nom arĩ Jejus kãm mẽ pahkwÿjê ho hkra hprãm jakamã na kormã amnhĩ tã mẽ hamã nê tokyx akupÿn wrÿk kêt nê. Na pre Jejus kôt mẽ pahõt Pawre Tĩrtũm nhÿ hã ã mẽ pamã ja hã kagà anê. Pawreja ixkràmnhwÿ mex na. ¹⁶ Na hte mẽ pakaxyw kagà nhĩpêx nê kamã mẽ pahte Jejus kutêp tãm amnhĩ nhĩpêx o papa hã mẽ pamã karõ. Na hte tõhã mẽmoj tã kagà pu mẽ kamã harê nê tee ri pahprĩ hã mar mã no ãm mar mex kêt nê. Hãmri nhũm Tĩrtũm kapêr o mẽ hêx o mẽ pa xwÿnhtaja haxwÿja kuma hãmri nê amnhĩ krã hkôt hijuk ri tanhmã ho hêx to. Te mẽ kot hprĩ hã mar nê harênh pyrãk nom hprĩ hã mar kêt nê. ã na htem Tĩrtũm kapêr ã kagà piitã ho hêx o pa anê. Mÿrapê koja mẽ nhÿrmã amnhĩ xà kamã hamak tÿx kumrêx.

¹⁷ Tã e Kris kôt ixkràmnhwÿjaja. Ra mẽ ate mẽ harênh mar jakamã kwa mẽ okora. Mẽ amnhĩ nê mẽ omunh mex nê mẽ hkôt amnhĩ nhĩpêx kêt nê.

Kot kaj mẽ anẽ nẽ Tĩrtũm kôt amnhĩ nhĩpêx mex kêt nẽ. ¹⁸ Na ka htem mẽ papytâr xwỳnh Pahihti Jejus Kris kôt ri amnhĩ nhĩpêx o apa. Tã kêr ka mẽ arĩ hkôt amnhĩ nhĩpêx mex rãhã ho ri apa. Nẽ hkôt amnhĩ xunhwỳr tỳx nẽ. Kêr kê amnhĩ tã mẽ apumu nẽ mẽmoj to mẽ akutã nojarêr nẽ. Krisja mex o mex nẽ hihtỳx o hihtỳx. Tã kêr pu mẽ kãm mex o mex ã mãn harẽnh rãhã ho ri papa.

Tã ãm ja pix. Ixpê Simãw Pêtre na pa ã mẽ amã ja hã kagà nẽ mẽ awỳr mẽnh anẽ.

Tĩrtũm kapēr ã kagà nyw
New Testament in Apinayé (BR:apn:Apinayé)

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 11 Nov 2022 from source files
dated 29 Jan 2022

383a4e22-34cd-505f-9cc2-2f9921e7aa9f